



PATRIARCHATVS

CONSTANTINOPOLITANVS.

LIBER NONVS.



E Asia, quæ ad Tanaim flumen Europam attingit, deinceps nobis dicendum est, saltem quoad illam partem, quæ Christi fidem amplexa tribus sedibus Patriarchalibus, quamplurimis Metropolitibus, innumerisque Episcopatibus insignita fuit. [Nomen habuit, si Eustathio^a credimus, ab Asia Atyis filio, vel ab Asia matre Promethei, authore Lycophrone: vel quod multas paludes habeat, ideoque luto-

I.
ASIA DESCRIP-
TIO.

^a Eustathius ad
Dionysium.

sa sit: *ἄσις* enim idem est quod *ἰλὺς*, id est lutum, apud Homerum. Quidam verò etiam Atticam aiunt olim Asida esse vocatam, & nonnulli Asium Philosophum dedisse Troi custodiendum palladium ex ligno fabrefactum: Troem verò in honorem illius viri regionem prius à se Epirum dictam, Asiam vocasse: à qua reliqua inde regio, ut à præstantiori parte, nomen accepit.] Vult tamen Stephanus^b ab Asia ciuitate Lydiæ vniuersam Asiam nuncupatam fuisse. Sed misso nomine, eam primum à Lucio Scipione, qui ob id Asiaticus vocatus est, Romanorum legibus subactam fuisse dicamus. Mox à Consulibus, & postea à Proconsulibus est administrata: demum translato Imperio in Orientem à Constantino magna ex parte cum Thracia Præfecto Prætorio Orientis subdita. Eum quinque maiores Dioeceses administrasse in Notitia ciuili Imperij Romani dicitur, nimirum Asiam, Pontum, Thraciam, Orientem & Ægyptum: de duabus vltimis, ubi de Patriarchatibus Antiochiæ, Ierosolymorum, & Alexandriæ sermo nobis erit. Iam de tribus primis scribendum duximus.

^b Stephanus de
urbibus.

Asia quidem multifariam sumitur: nunc pro vna ex quatuor mundi partibus: alias pro ea tantum Prouincia, quæ inter Lydiam & Cariam ad mare Ægeum sita à Proconsule regebatur: tandem pro vna ex quinque Dioecesebus Præfecto Prætorio Orientis subditis. Hæc vltimo modo accepta in hæc Prouincias vndecim apud Notitiam ciuilem Imperij Romani sic diuiditur, nempe Asiam Proconsularem, Pamphylia, Hellespontum, Lydiam, Pisidiam, Lycaoniam, Phrygiam Pacatianam, Phrygiam Salutarem, Lyciam, Cariam, & Insulas. Asia Proconsularis iam descripta est.

II.
ASIAE PROCON-
SULARIS DESCRIP-
TIO, MINORIS-
QUE Prouinciæ.